



特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲申報事該 臣 看得劉永芳與高氏謀殺安二
姐一案緣二姐之父安進功遠出未回繼母高
氏與劉永芳比隣而居通姦日久後知進功回
家有期永芳恐二姐洩其姦情遂與高氏商謀
欲圖併姦以冀容隱又慮二姐不從其姦復定

滅口致死之計於康熙二十五年十月二十九
日夜永芳裸赤下體登榻逼姦二姐秉性貞潔
堅執不從永芳先持棍槌狠擊繼使火鏟燒烙
高氏亦擒住二姐兩手又用火筋扎腿週身上
下已無完膚二姐尚未殞命永芳高氏復用藤
繩狠勒以致二姐立時身死慘毒甚矣乃永芳
克惡愈熾又以小刀戳其陰戶割其兩膝以洩
強姦不遂之憤歷審二犯供認不諱檢驗傷械

俱真劉永芳應照謀殺人造意者律擬斬高氏
依故殺子女律應杖徒係婦人例得收贖照依
犯姦例枷責實有餘恨高祿聽從囑託照律滿
杖追贖入官劉三黑子楊媒婆均各重杖楊媒
婆係婦人照例收贖劉應昌照犯姦例枷責時
逢熱審高氏高祿劉三黑子楊媒婆劉應昌均
應減等發落劉永芳所送高氏衣服四件變賣
入官武進才無干省釋再查安二姐以村庄幼

女堅貞自矢甘受慘殺不爲所污應

請

特賜旌表以振風俗至於高氏身爲繼母已欲宣淫
又與姦夫商謀逼女行姦不從殺命戕屍母道
全無倫理滅絕若猶以母女分定不加重擬其
何以戒天下之爲繼母而淫且毒者但此等罪
惡律無正條應否比照故殺前夫之子律以凡
人論擬斬抑或比照凡謀殺人從而加功者律

擬絞仰祈

皇上勅部確議特著從重擬罪之例以正風化以杜
殺機以爲淫毒者戒理合具

題伏乞

勅部核議施行臣未敢擅便謹

題請

旨康熙二十六年五月二十四日題六月初五日奉
旨三法司核擬具奏該刑部臣等會同都察院大理

寺會看得劉永芳等謀殺安二姐一案據直隸
巡撫于成龍審擬斬杖併請將高氏從重定擬
具題前來查安二姐之父安進功出徃別省劉
永芳與二姐繼母高氏通姦日久後知進功回
家有期恐二姐洩其姦情遂與高氏商謀欲行
併姦以圖容隱若不從擬定致死滅口於康熙
二十五年十月二十九日夜永芳逼姦二姐二
姐堅執不從永芳先持棒槌狠擊繼用火鎗燒

烙高氏擒住二姐兩手用火筋扎腿身無完膚
復同永芳將二姐用藤繩套脖狠勒以致二姐
立時身死該撫歷審各自認情真劉永芳合依
謀殺人造意者斬監候律擬斬監候秋後處決
高氏知安進功回家有期恐二姐洩其姦情與
劉永芳商謀併姦以圖容隱如不從擬定致死
滅口劉永芳逼姦二姐二姐堅執不從高氏擒
住二姐兩手用火筋扎腿身無完膚又將二姐

用蔴繩套脖狠勒以致二姐立時身死查律內
凡父母故殺子者杖六十徒一年繼母殺死者
加一等等語但高氏情罪可惡應比照故殺妻
前夫之子以凡人論斬監候律擬斬監候秋後
處決刑書高祿聽從劉永芳囑托受錢四千暗
換刀鞘高祿合依官吏受財計贓科斷枉法贓
一兩至五兩杖八十無祿人減等律應杖七十
遇熱審減等杖六十折責二十板革役劉三黑

子囑楊媒婆轉央高氏不扳永芳劉三黑子楊
媒婆俱合依不應重律各杖八十折責三十板
劉應昌先曾與高氏通姦合依民人與相等人
妻通姦者枷號一個月責四十板例枷號一個
月責四十板但劉三黑子等事犯在康熙二十
六年五月初三日

赦前應免罪高祿所得之錢併高氏所得衣服俱照
追入官安二姐堅貞自矢不爲所污其應旌表

之處交與禮部議可也等因康熙二十六年六月初七日題十一日奉

旨劉永芳高氏俱依擬應斬着監候秋後處決餘依議

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲揭報濫刑縣令以儆酷吏事該 臣 看得縣令
與民最親必慈祥愷悌慎獄恤刑始無負牧民
之任 臣 仰體

皇上愛養羣黎至意誠恐所屬各官有濫用刑責殘
虐小民屢經嚴飭不啻至再至三乃猶有真定

府武強縣知縣潘拱辰者因民婦鄭氏控告伊夫耿運昌爲生員宋亮工家傭工被打身死情由潘拱辰不虛公推鞫輒將無辜之白大青併戴銀等七人及年滿七十之宋邁衆俱疊加刑夾以致民怨沸騰似此一官居心殘刻濫刑無辜小民受害法紀全無難以姑容民上臣謹特疏糾叅伏乞

勅部察議施行臣未敢擅便謹

題請

旨這所叅潘拱辰居心殘刻濫刑無辜着革了職該撫提問究擬具奏該部知道

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲

聖德格

天甘霖普澍直屬皆已霑足并請借給倉穀以資播植
事該_臣看得康熙二十六年自春徂夏天行亢
旱時雨愆期我

皇上保赤如傷之念焦勞日夕五月二十日
皇上親詣

天壇齋心虔禱巍巍

聖德上格

天心

鑾輅方還甘霖隨降其感應神速真有逾於

商帝桑林之禱矣

臣

先經檄令守道行查各屬有無

雨澤并麥收分數去後今據守道叅議朱弘祚

詳稱保定各府屬申報得雨分數自五月二十
日起連日陰雨入地三四寸五六寸不等土膏
酥潤四野霑足民皆歌頌

皇仁欣思播種秋成有望但今歲二麥失收窮黎乏
食除雄縣博野藁城定州衡水寧晉晉州新城
容城任丘東明長垣等州縣麥秋有收外其餘
各屬州縣統計收穫止一二分三四分不等小
民播種之後秋成尚遠餬口無資并請借動積

穀使民得以粒食接濟青黃仍於秋收後勸捐
還項等因臣查康熙二十五年奏冊各屬見存
捐輸米麥糧穀除捐貯宜倉米三千九百一十
七石零外實存五萬三百三十一石二斗零銀
一千五百一十五兩錢八百文原屬備賑之項
今時雨大沛小民雖經播種而有乏食耕耨無
資者應令各州縣查明酌量借給以濟燃眉庶
不負我

皇上鞠育元元至意其有各州縣衛向無捐貯倉穀
者卽於此數內通融動借仍俟秋收後照數催
取還倉倘有真正窮黎力不能措還者令各該
地方官勸捐補項則倉穀之原數不虧而小民
得盡力南畝以冀秋成將見斯倉斯箱皆嬉游
於

堯天舜日之中矣理合具

題伏乞

勅部議覆施行康熙二十六年六月初五日題本月
十二日奉

旨該部速議具奏該戶部臣等查得直撫于成龍疏
稱時雨愆期

皇上齋心虔禱

鑾輅方還甘霖隨降土膏酥潤四野霑足民皆歌頌
皇仁欣思播種但各屬州縣秋成尚遠所有捐輸米
麥糧穀共五萬三百三十一石二斗零銀一千

五百一十五兩錢八百文此原係備賑之項應
酌量借給其有各州縣衛向無捐貯倉穀卽於
此數內通融動借俟秋收後照數催取還倉倘
有真正窮黎不能措還者令該地方官勸捐補
還原項等因前來查所貯銀錢米穀原係備賑
之項今該撫旣稱酌量借給俟秋收之後照數
補還等語俱應如所請准其動借仍將動過數
目造冊報部查核可也等因康熙二十六年六

月十五日題本月十七日奉

旨依議

特加太子少保巡撫直撫等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲駐防變例採買荒歲兵苦民累情勢懸危籲
題罷斥以謝衆口以救殘生事該_臣看得三河縣
駐防兵丁米石歷年俱係

京倉支領康熙二十六年分米石准部咨概令本
處給發隨檄守道轉行遵照嗣據該道叅議朱

弘祚以該縣地屬旗庄民情艱苦萬難採買轉
詳^臣三次咨部請照康熙二十三年定例照時
價折給官兵或循舊例仍在

京倉支領俱未經部允^臣卽檄該道動撥庫銀照
例每石給銀九錢五分發該縣採買在案今據
該道詳稱該縣民地無幾二麥歉收米價日騰
市集空虛無處採買遵奉部行嚴加催飭據該
縣申詳先請捐賠自糴一百石倡給續俟民間

隨買隨給固山大馬庫不許又請會詳該縣自
僱車輛煩撥什庫等赴

京倉領出代運到縣馬庫亦不許該縣無法可施
情願

題叅罷斥查該駐防米石於四月間准到部咨卽
發銀採買疊據固山大馬庫移催隨嚴行守道
轉飭辦給三河縣知縣彭鵬延捱至今尚不辦
給實難辭遲延之咎相應

題叅聽候部議但查直屬採買一事既有累於官
民而實無所利於防兵卽令預給銀兩四處買
辦亦不過在隣封之內米價相去不遠轉運頗
費脚力勞民傷財原非可久之道至三河縣地
衝民疲較之各屬尤處萬難勢不能兼顧兵民
自必胥受其怨此該縣知縣彭鵬所以不顧功
名甘心罷斥詳請

題叅也

臣

伏念我

皇上凡地方利弊民情艱苦無時不厯於

聖懷

臣

旣目擊累民之事曷敢不以實

告負我

皇上愛育元元至意仰祈

睿鑒

勅部確議該駐防米石或照固安等處現行之例仍

赴

京倉支領或改令通倉支給免其採買則官民無

賠累之苦而駐防兵丁亦無遲悞之虞矣既據
該道呈詳前來理合具

題伏乞

勅部確覆施行康熙二十六年六月初七日題本月
十六日奉

旨該部議奏

特加太子少保巡撫直隸等處地方管轄紫荊等關
宣府一鎮地方密雲等關監贊理軍務兼理糧
餉都察院右僉都御史臣于成龍 謹

題爲諮訪利弊以資政治以安民生事該_臣看得
歲修民堤原係地主按畝均役非同運河有額
設錢糧夫役者可比今滿城一邑旗庄之地多
而民地少每歲修葺堤堰無論是旗是民之地
唯有小民從遠處挑土培築獨任勞苦似非力

役之公也茲據該縣詳稱凡旗民地畝錯雜之處請按畝均出夫役互相協修以均勞逸臣隨檄守道通查又有永平府屬之灤州境內稻地渠河堤岸坐落旗園之內而外接壤民田亦係民人歷年代爲修築議令嗣後歲修堤岸就近取土計畝出夫旗民均任其責併將滿城灤州應修堤岸各庄屯旗色佐領並旗民協修之處造冊呈請前來除冊已經咨部外理合具

題伏乞

勅部議覆施行臣未敢擅便謹

題請

旨康熙二十六年四月三十日題五月十三日奉

旨該部議奏該工部臣等查得直隸巡撫于成龍疏稱滿城縣旗地多而民地少每年修葺堤堰無論是旗是民之地惟有小民從遠處挑土培築獨任勞苦似非力役之公也又永平府屬之灤

州稻地渠河堤岸坐落旗園之內而外接壤民
田亦係民夫修築今議令嗣後歲修堤岸就近
取土計畝出夫旗民均任其責等因前來查康
熙二年臣部具題八旗相對堤岸如今旗下人
修理或有設一二人夫耕地者亦有無夫將地
租與人者是以將堤岸不責令旗下人應行該
撫責令該地方官每年查勘有壞決處卽酌派
民夫修理不致潰壞若潰壞處大民夫不能修

理者該撫親赴決處確勘估計需用錢糧具題
以憑另議等因具題奉

旨依議欽遵在案相應將該撫所稱修理堤岸旗民
均任其責之處無庸議者也等因康熙二十六
年五月二十七日題六月初一日奉

旨這本內事情着再確議具奏欽此於六月初二日
抄出到部該臣等再議得先經直撫于成龍具
題諮訪利弊一案臣部議覆查康熙二年臣部

具題八旗相對堤岸不責令旗下人責令該地方官酌派民夫修理在案應將該撫所題之處無庸議等因具題奉

旨這本內事情着再確議具奏欽此查該撫疏稱今修堤岸無論是旗是民之地惟有小民從遠處挑土培築獨任勞苦似非力役之公今議嗣後歲修堤岸就近取土按畝出夫旗民互相協修等語查旗下地畝所對堤岸從前雖無取旗夫

修理之處但修堤俱係護衛地畝如止令民夫修理必致偏苦嗣後若有此等小修堤岸工程無論旗民均按地畝出夫修理如有應修之處該撫卽將應修地方所用夫役算明預先報部旗下應出夫役者行文該旗都統差賢能官前往工所同地方官估計需用夫役按地派取督修民間應出夫役者該地方官率令與旗下官一同督修此出夫之時必須均勻派取該管官

若派夫不均或有借此多派等弊該都統巡撫
指名題叅嚴加治罪再查旗下地畝亦有本身
不能耕種租與民間者民間地畝租與旗下耕
種者若止令地主出夫貧人艱難而工程有悞
亦未可定修理堤岸恐其所種之地被水冲决
應俱令現在種地之人出夫修理以仰副

皇上均念旗民至意俟

命下之日行文八旗直隸巡撫轉行該屬一體遵奉

施行可也等因康熙二十六年六月十三日題

本月二十日大學士明 等轉傳

上諭奉

旨這本內事情着該部差司官一員會同巡撫于成
龍確議具奏欽此於本月二十一日工部將郎中
党愛沈圖職名繕寫綠頭牌啟奏奉

旨着党愛去欽此於本月二十三日郎中党愛温保

恭請

諭旨奏事敦柱轉傳

上諭奉

旨此原係巡撫伊具題之事已經九卿會議今將作何所議之處帶回亦着諸臣議覆與爾等無涉但從中間如何有益之處令其多說毋得刪阻原疏內有不明數款着伊核議明白帶來欽此臣等於六月二十五日抵保定府將部議之事並

諭旨俱與巡撫于成龍看問據巡撫臣于成龍議得

部臣所議修堤俱係護衛地畝如止令民夫修理必致偏苦嗣後若有此等小修堤岸工程無論旗民均按地畝出夫修理是誠善矣至修堤岸恐其所種之地被水冲决應俱令現在種地之人出夫修理等語是不問地主專責之佃戶以地主入少而佃戶衆多也部臣之意未始不公但臣身在地方灼見委曲竊以爲有萬萬不可者查各旗庄地畝每皆租佃於民而民之

地畝從無租佃於旗人者故凡耕耘之夫皆係
民人而非旗下今若專責之佃戶則直屬各處
堤岸仍屬民修與旗無涉卽向來旗民互相協
修與夫臣通查之後旗人情願協修之處反使
小民獨受其勞旗人得以搯手坐視矣況佃戶
更易不常終歲勤動所獲無幾何苦費自己之
氣力爲他人築此堤岸耶今若但責之地主則
偏累於旗亦非平情之論且恐旗人不善畚鍤
修理不能堅固亦未可定臣愚以爲直屬凡有
旗庄地畝處所悉令旗民互相協修其協修之
法酌計十分工程旗與民各認其半按其地之
多寡議令地主無論在

京在屯或夫或銀聽其自便該州縣同屯撥什庫
督令伊等酌量取土修築務令堅固永爲遵守
抑臣更有請者部臣議令都統差賢能官前往
工所同地方官估計需用夫役等語今旣令旗

民互相協修已無派取不均之處其估計堤岸
丈尺及地畝多寡按地出夫之處但責之地方
官及屯撥什庫已足料理停其另差旗員遍歷
各州縣者也如是則堤岸永固地畝無虞而旗
民亦無偏累之苦等語爲此謹

題該工部等衙門會覆郎中党愛等題前事等因
康熙二十六年六月二十九日題於七月初一
日給與他庫爾什敦柱轉奏本日大學士明珠

轉傳

上諭這事着九卿詹事科道官員會議具奏欽此該
臣等會議得工部郎中党愛等疏稱據直撫于
成龍議得直屬凡有旗庄地畝處所悉令旗民
互相協修酌計十分工程旗與民各認其半按
其地之多寡議令地主無論在京在屯或夫或
銀聽其自便該州縣同屯撥什庫督令酌量取
土修築其地畝多寡按畝出夫之處但責之地

方官及屯撥什庫停其另差旗員如是則堤岸
永固地畝無虞而旗民亦無偏累之苦等語查
修理堤岸原爲保障地畝應如該撫所題應令
旗民均分修理但屯撥什庫俱係小人并家奴
如不能管理修築反致有悞嗣後堤岸或預爲
修理或決後修理該撫查明具題工部差賢能
官員會同地方官確勘查明將工程分列到日
工部計所對沖決旗分佐領地畝量其工程委

出旗下官員人夫同地方官堅固修理如有監
修官員苦累地方人民等情該撫指名題叅之
日該部嚴加治罪可也等因康熙二十六年七
月初四日題本月初七日奉

旨這修築堤岸事情俱照該撫議奏行

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲夫婦濟惡陷殺妻命賊計移屍捏汚垢玷叩

天電寃洗耻正法事該 臣 看得寶坻縣武舉李

名超親妹李氏適吳潤溪爲妻因有隨嫁奩房
七間遂與名超同居值潤溪父子謀食山東遺
氏孤處名超縱妻栗氏恣肆凌虐致李氏抱憤

於康熙二十五年七月初一日投繯身死名超
縱妻逼死親妹罪已難逃乃不自慚懼引罪反
捏稱氏與生員劉祚永有染嫁禍無辜以汚死
者朦朧結案今氏夫吳潤溪歸家控訴氏寃名
超復敢用賄行求有干法紀查李氏投繯雖在
康熙二十六年五月初三日

赦前但名超縱妻逼死親妹誣捏汚詞情事殊爲可
惡且用賄行求仍在

赦後相應

題叅請

旨革去武舉以便提審寃擬至寶坻縣知縣王嘉亮
清潔自持出首行賄所當併請

勅部議叙以獎廉吏旣據該道呈詳前來理合具
題伏乞

皇上睿鑒施行臣未敢擅便謹

題請

旨康熙二十六年七月十一日題本月

日奉

旨李名超着革去武舉該撫嚴提寃擬具奏王嘉亮
出首行賄可嘉着議奏該部知道

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲旗棍屠官急號立誅事據懷柔縣知縣強致
中申詳前事內稱康熙二十六年七月二十四
日有本城郭守備同旗人牛四毆持喊嚷攔闖
宅門卑縣詢其情由據稱爲債利之故因兵及
主倉惶之際未獲細訊卽將毀裂衣服貯庫外

卽於本日准本城守備郭梅移會前事內稱切
照廂白旗萬惡王庄庄頭牛成麟牛大爺牛二
爺牛三爺牛四爺牛太爺餘黨數十父子濟惡
結黨朋奸在本城內開放印子錢舖放銀一兩
每日交利錢六十六文一月始完還者計誘復
借欠者加利私刑勒逼敲骨吸髓罪惡滔天禍
緣亢旱乏食窮兵向惡揭錢本城蹇因水洞坍
塌於本月二十四日親身往看適帶軍伴陳瑞

聶留州路經伊門不料惡卽截取前欠拳踢交
加陳瑞幸脫留州垂危本城理論反觸虎威惡
更嚇令多克百般凌辱蜂擒舖內毒殺衣帽寸
裂傘葢印匣一光急奔號救衣傘貯庫現據切
思旗棍放錢一月倍利已屬違禁統惡數十屠
戮職官法紀何存懇祈轉詳嚴鞫立誅庶職官
得以雪冤旗棍知有

國法矣擬合移會等因准此隨卽差傳牛成麟等

面訊情由去後續據差役回稱牛成麟等俱經
赴

京回主只有牛四見在等情據此該卑縣查得牛
成麟等以債利細故因兵及主輒將守備郭梅
擅肆毆持事干法紀但牛成麟等身係旗人既
已赴

京卑縣無憑查訊擬合詳報等情申詳到臣該臣
看得違禁取利律有明條毆辱職官法所難容

不謂懷柔縣居住鑲白旗下庄頭牛成麟等父
子勾結棍黨開張印子錢舖每月加倍取利適
有兵丁陳瑞等揭伊印錢未清攔街毆打併將
該管守備郭梅擒拿舖內既毀其衣帽傘蓋而
復肆行毒毆真可謂目無法紀者矣所當特疏
題叅伏乞

勅部嚴拿究處施行臣未敢擅便謹

題請

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲呈報穀出雙穗事據直隸守道叅議朱弘祚
呈稱據新城縣申稱據馬村河士民范奉山等
呈稱穀出雙穗兆

國家之祥瑞今本縣各村雙穗者不可勝數理合
摘賚呈報等情又據中旺村士民董一文等澤

畔社士民張朝忠等俱各呈報到縣據此該卑
職查得穀惟

國寶食乃民天嘉穀奮興爰占有道休徵之應茲
惟我

皇上以堯舜之心爲心博施濟衆大沛

恩膏於遐邇是以得

天地之和而雨厥百穀茲屆寶告西成卑縣地方黍稷
茂盛疊據士民呈報穀生兩穗稱慶喧堂詢之

里老皆曰兆

國家之祥瑞故爾賫報卑職不敢隱諱具文申報
等情到道據此案查爲請

旨事康熙二十年十月二十七日蒙前任于撫院票
開准戶部咨福建清吏司案呈奉本部送戶科
抄出本部題前事竊以

國家瑞兆雖原不取於草木鳥獸之珍但

朝廷首重農事若遇穀麥之多岐實係豐年之瑞兆

歷稽前代如故明太史劉基有瑞麥頌之獻再
宣德間有御製滿庭芳之詞詩咏來麩史載岐
麥斯皆古帝王德化普被致能感召

天和示以至治之符垂千秋而光一代誠盛典也查向
來穀麥有多岐之瑞皆曾進奏逮至康熙八年
直隸巡撫金世德題報恭進嘉穀奉有以後麥
穀多岐不必進奏該部知道之

旨仰見我

皇上無爲成治原不以物取瑞但

聖明在上德澤普及既有物瑞應之不妨許其進奏

垂諸史冊用光一代是以臣等敢請我

皇上以後遇有此等麥穀之瑞仍許奏

聞俾海宇共樂昇平庶

熙朝盛典垂留萬世而地方各官亦咸以重農敦

本爲事仰承

德化矣恭候

命下臣部通行直隸各省遵行可也等因康熙二十
年十月十三日題本月十五日奉

旨依議欽此欽遵抄部送司奉此案呈到部移咨到
院票行到前道遵奉在案該本道查得直隸地
方頻年屢沐

皇仁賜蠲賜賑業經至再至三今歲正賦錢糧又奉
盡行豁免閭閻士庶頂頌

隆恩不啻感深骨髓前四五月間天道偶亢我

皇上宵旰靡寧虔誠祈禱隨見甘霖大沛禾苗勃發
本道奉委山海關會審

欽案目覩高下地畝百穀俱成詢諸鄉老已識大有
之年今據新城縣馬村河等村穀生雙穗不可
勝數具文賫報前來益知

皇仁溥遍上格蒼旻靈開土澤禾穀之祥非無故也
案奉部文以後麥穀之瑞仍許奏

聞俾海宇共樂昇平庶

熙朝盛典垂留萬世而地方各官亦咸以重農敦
本爲事等因在案理合據實報明伏乞本院具
疏上

聞以昭盛世至治等因呈詳到臣該臣看得民爲邦
本而食乃民天故歲登大稔家有倉箱之慶穀
生雙穗人稱祥瑞之徵今保定府屬之新城縣
馬村河等村地方穀秀兩岐者不可勝數據守
道叅議朱弘祚具文賫送前來臣竊惟詩咏來

蕤誠

盛時之豐豫史書岐麥實

昭代之嘉祥我

皇上宵旰憂勤虔誠祈禱感格

天和而甘霖普遍化隆

至治而嘉穀呈祥誠豐登大有之徵共樂昇平之

兆也臣恭覩休祥實深懽忭謹將雙穀函封賫

進恭呈

御覽伏乞

睿鑒施行謹

題請

旨

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲劇郡亟需能員保舉恐違常例仰請

睿裁揀選補用以資治理事竊惟保定府城自前撫
臣金世德移駐之後設立守巡二道總滙八府
錢穀刑名已成省會之區更兼旗民雜處事務
殷繁實與別府不同其知府一官非才猷敏達

操守清慎者不克勝任况一切

欽部重案自推官奉裁各省皆責成知府審理直屬
刑名事務由各該州縣審解守巡二道歷年以
來皆因知府不得其人每歲調取同知通判並
附近州縣等官赴保賃住民房更易值季承審
案件切思設官分職各有專司如一經調取值
季本任職掌事務勢不能兼顧不特曠時廢職
抑且有悞地方如知府得人就近發審何必又
調值季之官紛紜滋擾是以保定府知府最爲
緊要之員今知府康正吉昏庸病廢經臣具疏
糾叅員缺例應銓補但必得才守兼全政事敏
練者方克勝此繁劇之任伏乞

皇上睿鑒勅部揀選賢能之員補授或

恩准臣不拘常例破格將直屬賢能之員保

題陞補其有裨於劇郡之吏治民生均非淺鮮矣

臣謹具

題伏乞

睿鑒勅部議覆施行臣未敢擅便謹

題請

旨

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍謹

題爲遵

諭密奏事該

臣看得順天府屬地方密邇

京畿年來盜劫頻聞商民交困經臣條議於通州

蘆溝橋黃村沙河四處設立捕盜同知各一員

緝捕盜賊綏靖地方業經部覆奉有

俞旨行臣選擇

題授臣於屬員中公同守道叅議朱弘祚巡道僉事胡獻徵詳加揀選考驗得開州知州馬汝驍固安縣知縣武廷适雄縣知縣王輔長垣縣知縣秦毓琦等四員俱皆年力精壯兼善弓馬堪膺捕盜之任其各官管轄地方酌量道里遠近分爲東南西北四路擬將固安縣知縣武廷适陞補東路同知駐劄通州應給通潞捕盜同知

關防兼永平府同知銜長垣縣知縣秦毓琦陞補南路同知駐劄黃村應給黃村捕盜同知關防兼河間府同知銜雄縣知縣王輔陞補西路同知駐劄蘆溝橋應給蘆溝橋捕盜同知關防兼保定府同知銜開州知州馬汝驍陞補北路同知駐劄沙河應給沙河捕盜同知關防兼保定府同知銜各分管州縣衛所地方備列疏前毋容繁贅此所設同知按其分管州縣分聽通

永霸昌二道兼轄如三年之內全無盜案或有盜案隨即拿獲作何議叙或有盜案數起已完一半以上或不及一半者作何分別處分應聽部臣定例遵行其駐劄衙門暫令各官賃住民房徐俟請銀建造或勸捐建造至於各官應行事宜添設馬步快手及各項衙役並應支官俸役食備載在冊統聽部議如有未盡事宜俟臣巡歷時勘明另行請

旨定奪既據該道等呈詳前來除將保結並冊揭咨部外理合保

題伏乞

勅部議覆施行臣未敢擅便謹密

題請

旨

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲劇郡亟需能員保舉恐違常例仰請

睿裁揀選補用以資治理事該_臣看得通州知州一
缺例於現任官員內選擇

題補今通州知州方燧陞任員缺_臣准部咨檄行
守巡兩道照例會同選擇茲據守道參議朱弘

祚巡道僉事胡獻徵詳稱安肅縣知縣李會生
賢能素著堪以陞補通州知州呈詳前來

臣查

通州係近

畿衝要之地知州一官必得才幹優長者始克勝
任李會生蒞任安肅四年有餘一切地方事務
區處得宜洵屬賢能之員以之補授通州知州
庶繁劇之地得獲用人之效矣理合具

題伏乞

大計曾經前撫臣格爾古德特舉卓異陞任湖廣
德安府通判去年通州知州員缺未得其人

臣

因方熺才能素著

題請陞補奉

旨俞允今自到任以來

臣

細加體察政務既克修舉

持躬更復廉潔允可稱為才守兼優之員以之

陞補保定府知府實能勝此繁劇之任亦獲得

用人之效矣

臣謹保

題伏乞

勅部議覆施行臣未敢擅便謹

題請

旨康熙二十六年九月初九日題本月十九日奉

旨該部知道該吏部臣等議得直隸巡撫于成龍疏

稱保定府知府必得賢能之員始克勝任具疏

題請荷蒙

皇上念此劇郡破格命臣將才守兼優者選擇具奏

茲據守巡二道將通州知州方熺詳請題補臣

細加體察政務既克修舉持躬更復廉潔允可

稱為才守兼優之員以之陞補保定府知府實

能勝此繁劇之任等因保題前來查品級考內

知州不准陞知府理應不准但先經該撫疏稱

保定府知府乞

勅部揀選賢能之員補授或

恩准臣不拘常例破格保題陞補等因具題奉

旨這員缺着該撫將才守兼優者選擇具奏該部知道欽遵在案相應將通州知州方熺照題補授保定府知府任內有紀錄三次應仍帶於新任本官現在直隸應停其給憑仍將到任日期報部註冊其通州知州員缺該撫照例選擇具題到日補授可也奉

旨依議

特加太子少保巡撫直隸等處地方管轄紫荊等關宣府一鎮地方密雲等關隘管理軍務兼理糧餉都察院右僉都御史臣于成龍 謹
題爲

天意呈祥嘉穀叠見謹再恭進

御覽事據直隸守道叅議朱弘祚呈稱據冀州申稱
據褚儀村鄉約王際昌等呈稱切照上有

聖君自有

天瑞本州地方今歲春夏微旱近秋甘霖普降月餘之內五穀齊收今見地內穀有雙穗實出罕見合將原穀報上等情到州據此竊惟至治之世

天必應以禎祥

有道之時

地亦呈其靈異故嘉穀傳於往事瑞麥具於前聞自昔所稱於今再見我

皇上蠲租薄賦春回蔀屋之天釋罪寬刑秋爽囿扉之日由是馨聞

上帝嘉種發乎雙岐福備

清朝樂歲登乎萬寶今茲瑞見東陽禘儀等村之地民獻南呂初二之辰喜洽編氓履畝而歌大有歡生下吏搦管而慶長祥事屬竒逢理宜申報等情又據邠州申稱據南路鄉民李贊等稟稱南鄉舍二村一帶所種穀子率多兩穗歷年以

來贊等真爲罕見今將兩穗者採取數莖呈驗
等情到州據此該卑職看得嘉禾挺秀麥穗兩
岐古來稱祥瑞表異政者不多概見茲迺恭遇
皇上蠲租減賦
大赦省刑以致

天庥協應農業召祥卽卑州徧小之區幸獲斯徵將見
普天率土大有興歌倉箱胥慶爲太平之有象
也等情又據文安縣申稱竊照卑縣本年五穀

豐登欣逢大有今據各里農民各將瑞穀恭送
到縣或有一莖兩穗者或有一莖三穗者或有
一莖四穗者瑞穀呈祥於畝畝收藏倍蓰於恒
年事關瑞徵理合申報等情又據定州申稱據
本州朱谷約劉家庄鄉民陳有具等稟稱竊照
國家有道必獻禎祥今歲秋禾雨澤均降高下豐
收查看本庄地內穀出雙穗事關祥瑞理合稟
報等情又據清風店鄉民鄭國棟等在城東街

鄉民王聖聰等肆舖鄉民張純等寨南約念子
疇村鄉民趙文政各具稟到州據此查民爲邦
本食爲民天禾苗收成之豐關乎

國運之盛今卑職治內穀秀雙穗雖民間之豐收
實

國家之祥瑞非

皇上雨澤之普施奚能臻此等情各到道據此該本
道看得黍苗應瑞雖驗德於坤貞雨露垂瀼實

仰資於乾運良以風雲一德適昭上下之和而
秬秠聯枝聿見天人之感前據保定府之新城
縣報穰穀有雙穗已經呈詳本院

題報在案茲又據真定府屬之冀州定州申報稽
儀等村保定府屬之祁州申報南鄉舍二村穀
有雙穗並據順天府屬之文安縣申報穀有兩
穗及三四穗不等各將瑞穀申送前來查兩岐
之秀不易見今獨茂於首善之郊雙穗之禾豈

常聞乃連穰於

畿輔之地非

皇仁普及其何以休嘉暢應異著町畦若是耶擬合

呈報等因呈詳到臣該臣看得嘉穀呈祥乃

天心之洽應而休徵叠見實

聖德之兆將前者新城縣地方穀秀兩岐據守道叅

議朱弘祚援例呈詳經臣恭進

睿覽在案今順天府屬之文安縣保定府屬之祁州

真定府屬之冀州定州各該地方穀苗多秀雙

穗甚有至三四穗者續據該道呈報前來竊惟

大有欣逢岐穀叢生於畝畝昇平幸邁嘉禾頌

溢於閭閻此皆我

皇上蠲租肆赦感兆

天庥尚德緩刑聿興

地瑞臣恭遇佳祥曷勝慶幸謹將穀穗函封齎

進恭呈

御覽倘各屬再有申報臣不敢屢瀆

宸聰合併聲明仰祈

睿鑒施行謹

題請

旨康熙二十六年八月二十四日題

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲舉首事該臣看得鉅鹿縣監生張無染仗財
恃勢於康熙二十六年七月十五日夜間率領
黨羽多人偷決堤口與徐士達等互相混鬪殺
傷數人經該縣驗明已死三人拿獲兇器有據
該縣拘犯嚴究乃張無染自知法網難逃輒敢

親投門生手本重賄求寬茲據該縣將行賄銀
五百五十兩貯庫出首前來相應具疏

題叅請

旨將張無染革去監生以便究擬至鉅鹿縣知縣王
朝佐凜遵

功令出首賄銀所當一併

題明以聽部議既據該縣呈詳前來理合具
題伏乞

勅部議覆施行臣未敢擅便謹

題請

旨康熙二十六年八月初九日題本月二十日奉
旨張無染着革去監生該撫嚴提究擬具奏王朝佐
出首行賄可嘉着議奏該部知道

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲除暴安良事該 臣 看得山東武城縣豪惡監

生米清臣父子濟惡橫行無忌流毒直隸真定
河間兩府屬隣近地方霸產殺命詐害平民恣
肆克滌欵蹟纍纍誠爲元惡大憝不可一日容
於

聖明之世前據被害士民張樂生等二十四詞赴道
疊告詳臣批行提審乃米清臣等倚恃隔省負
嵎抗匿不出以致被害証佐人等百十餘人拖
累守詞待質無日迨臣移咨山東撫臣提審始
經拘解查被害雖係直隸士民而米清臣乃係
東省惡監所告欵証衆多情罪重大直隸未便
卽行究擬相應特疏

題叅請

旨將米清臣革去監生以便與東省委員會審定案
爲此會同山東撫臣錢珏合詞具

題伏乞

睿鑒施行臣未敢擅便謹

題請

旨康熙二十六年九月初九日題本月二十一日奉
旨米清臣着革去監生該撫會同山東巡撫嚴審定
擬具奏

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲出首重賄事該_臣看得成安縣褫革生員黃

天保爲富不仁重利盤算刻剝小民經劉恕等

赴_臣衙門告發批行該縣審理乃輒敢率子黃

如玉重賄求寬茲據署成安縣事廣平府通判

馬斌將行賄銀三百兩出首前來除黃天保等

檄行巡道嚴提究審外該通判馬斌以署事之
員恪遵

功令出首賄銀所當特疏

題明以昭鼓勵者也臣謹具

題伏乞

勅部議覆施行臣未敢擅便謹

題請

旨康熙二十六年三月十四日題本月二十三日奉

旨據奏黃天保行賄求寬大干法紀該撫嚴提究擬
具奏馬斌出首可嘉着議奏該部知道

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右金都御史臣于成龍 謹

題爲出首重賄事
看得成安縣褫革武生黃
天保爲富不仁刻剝小民經劉恕等告發復行
賄求寬當據署成安縣事廣平府通判馬斌出

首臣特疏具

題奉

旨行 臣嚴提究審行據巡道僉事胡獻徵審擬招解
臣復親訊黃天保捏寫假契霸佔苗自立等地
畝累劉恕等賠糧朦稟王復諫作中不明賠銀
入已重利盤算準折汪霖生等房產強種甘羅
屯隨排地畝種種不法及至衆供確鑿又畏罪
持賄行求請寬歷審俱各自認不諱黃天保除
侵佔人田違禁取利等輕罪不議外其行賄求
寬合依凡有以財行求計所與之賍與受財人

同科例應照在法賍八十兩律擬絞監候賄銀
三百兩照例入官所霸地畝房產併所收花利
錢糧各追給主其子黃如玉隨父行求查一家
共犯止坐尊長應照例免議成安縣知縣張元
士聽信天保誣稟責斷王復諫賠銀亦應議處
但張元士已經別案革職亦無容議至狀內未
到人犯天保行惡各款俱經直認應免深求牽
連人等相應省釋查康熙二十六年五月初三

日

恩赦內開官吏衙役枉法受賍不

赦今黃天保持賄行求與受財人同科受賍者既在
不

赦行賄者亦難援免相應叙明以聽部議理合具

題伏乞

勅部核議施行臣未敢擅便謹

題請

旨康熙二十六年八月二十四日題



